



AKTUELNOSTI

Brčko bilo domaćin Strateškog foruma

Održan 21. sastanak rukovodilaca tužilaštava i policijskih tijela u BiH

Policija Brčko distrikta BiH bila je domaćin 21. redovnog sastanka rukovodilaca tužilaštava i policijskih tijela na strateškom nivou održanog 28. maja u Brčkom. Ovaj vid saradnje tužilaštava i policije realizira se u okviru aktivnosti Projekta „Jačanje tužilačkih kapaciteta u sistemu krivičnog pravosuđa“, koji implementira Visoko sudsko i tužilačko vijeće (VSTV) Bosne i Hercegovine uz finansijsku podršku Švicarske i Norveške.

Sastanku u okviru Strateškog foruma prisustvovali su: glavni federalni tužilac Federalnog tužilaštva FBiH Munib Halilović, glavni republički tužilac Republičkog javnog tužilaštva Republike Srpske Mahmut Švraka, glavni tužilac Tužilaštva Brčko distrikta BiH Zekerija Mujkanović, direktor Državne agencije za istrage i zaštitu (SIPA) Darko Ćulum, načelnik Terenskog ureda Mostar Federalne uprave policije Mirko Kuprešaković, direktor Ministarstva unutrašnjih poslova Republike Srpske Siniša Kostrešević, domaćin sastanka -šef Policije Brčko distrikta BiH Goran Pisić, te predstavnici projekta Amila Rahić i Aleksandra Todorović.

Tokom sastanka razgovarano je o aktuelnim pitanjima u radu tužilaštava i policijskih agencija, evaluaciji upotrebe Uputstva za saradnju ovlaštenih službenih lica i tužilaca, rješavanju krivičnih djela trgovine ljudima, prijedlogu tema za edukacije ovlaštenih službenih lica, te o drugim aktuelnim aspektima saradnje.

Strateški forum rukovodilaca tužilaštava i policijskih tijela održan je uz poštovanje svih epidemioloških mjera, a ponovo je potvrdio ovaj vid saradnje kao najbolji, pa će se i u narednom periodu nastaviti dosadašnja praksa ujednačavanja stavova i podjele najboljih praktičnih iskustava među institucijama.

Tužilaštvo Brčko distrikta Bosne i Hercegovine, 31. MAJ 2021. godine

**GLAVNI TUŽILAC
ZEKERIJA MUJKANović**